



SKIETBAAN VEILIGHEIDSREËLS EN STANDAARDBEVELE

Hierdie “Skietbaanveiligheidsreëls vir Deelnemers” en “Standaardbevele op die Skietbaan” is vanaf 1 Oktober 2013 verpligtend op alle skietbane wat deur takke van die SA Jagters- en Wildbewaringsvereniging (SAJWV) bedryf word en sal in hemsakgrootte kaartjies aan alle besoekers aan skietbane beskikbaar gemaak word.

Die doel van die reëls i.v.m. gewere in sakke of tasse is om te verseker dat gewere slegs met die nodige bevel en onder toesig van die Baanoffisier hanteer word. Dit beperk enige ongemagtigde hantering van gewere op die skietbaan:

- 'n Skut betreë die skietpunt met 'n geweer in 'n sak of tas en verlaat die skietpunt by voltooiing van die skietoefening weer met die geweer in 'n sak of tas, nadat op die skietpunt onder toesig van die Baanoffisier en Baanbeamptes bevestig is dat die skut se geweer veilig en ontlaaie is by aanvang en by voltooiing van die skietoefening.
- Dit is 'n universele praktyk wat wêreldwyd gevolg word;
- By takke van die SAJWV besoek nuwe en onervare lede daagliks vir die eerste keer 'n skietbaan tydens 'n georganiseerde skietdag en die toepassing van die reëls i.v.m. gewere in sakke of tasse, vergemaklik die Baanoffisier se taak om veiligheid op die skietbaan te verseker.
- Hierdie praktyk skep 'n atmosfeer van veiligheid vir almal op die skietbaanterrein.

Die “Skietbaanveiligheidsreëls vir Deelnemers” en “Standaardbevele op die skietbaan” sal die aktiwiteite op skietbane vereenvoudig tot op die punt waar elkeen betrokke – Baanoffisiere en deelnemers – weet wat om volgende te verwag met gepaardgaande groter duidelikheid en veiligheid op SAJWV skietbane

SKIETBAAN VEILIGHEIDSREËLS VIR DEELNEMERS

1. Die Baanoffisier het die finale gesag op die skietbaan en het die reg om teen onveilige en ongehoorsame deelnemers op te tree.
2. Opdragte van die Baanoffisier moet onvoorwaardelik en onmiddellik uitgevoer word.
3. Deelnemers is onderhewig aan die betrokke skietbaan se reëls en moet die Baanregister en die Vrywaringsvorm teken.
4. Geen persoon onder die invloed van alkohol of narkotiese middels mag die skietbaan betreë nie.
5. Geen alkohol mag tydens die skietoefening op die skietbaan gebruik word nie.
6. Vuurwapens moet ongelaaie op die skietbaanterrein arriveer in 'n doeltreffende sak of tas.
7. Vuurwapens mag net uit 'n sak of tas gehaal word in direkte opdrag van die Baanoffisier op die skietpunt en die lope moet dan te alle tye in 'n veilige rigting gerig wees.
8. Vuurwapens mag nie op die skietpunt hanteer word terwyl enige persoon voor die skietpunt is nie.
9. Deelnemers wat 'n handwapen aan hulle liggaam dra moet dit aan die Baanoffisier of -beampte verklaar, onder toesig veilig maak op die skietpunt en weer terugplaas in die holster aan sy liggaam. Die handwapen mag slegs weer gelaai word na die skut die skietbaan verlaat het en op pad uit die skietbaanterrein is.
10. Veilig verklaarde vuurwapens moet in sakke of tasse wees tydens beweging tussen skietpunte.

11. Gehoorbeskerming is verpligtend en oogbeskerming word ten sterkste aanbeveel.
12. Toeskouers en wagtende deelnemers moet ten minste 10m agter die skietpunt wees, of buite die sigveld van die Baanoffisier. Voorts moet hulle gehoorbeskerming dra en stil wees terwyl geskiet word.

STANDAARDBEVELE OP DIE SKIETBAAN

Geen skuts of toerusting op die skietpunt alvorens die Baanoffisier die opdrag gee:

1. “Skuts na die skietpunt. Vuurwapens bly in sakke of tasse tot verdere bevele”.
2. “Die baan is gesluit (toe)”.
3. Die Baanoffisier of -beampte besoek elke skut individueel en beveel: “Haal uit, verklaar en wys veilig”.
4. Baanoffisier verduidelik skietoefening/inskietoefening en allokeer ‘n teiken aan elke skut op die skietpunt.
5. “Neem skietposisie in en verstel visiere/teleskope”
6. “Oog- en oorbekerming”.
7. “Laai en maak gereed” (laai magasyn/kamer vir enkelskoot vuurwapens en **grendel bly oop**).
8. “Is almal gereed?” – skuts wat nie gereed is nie moet aanduiding gee.
9. “Die aflossing is nog nie gereed nie” – indien so aangedui.
10. “Almal is gereed – sluit grendel en staan by” – met die snellervinger langs die snellerbeuel.
11. “Blaas fluitjie” of gee bevel “vuur” (tydens inskietoefening mag skut vuurwapens omruil binne tyd van oefening).
12. Na verloop van voorgeskrewe tyd: Blaas fluitjie of gee bevel “stop”.
13. “Ontlaai, maak veilig” - Na die proses van ontlaai en veilig maak, mag die skut die vuurwapen neersit met die loop in ‘n veilige rigting gerig, maar hy moet by sy geweer bly en wag vir sy inspeksie.
14. In gevalle waar slegs van skietposisie op dieselfde afstand verander word, word bevele vanaf punt 4 herhaal.
15. Voordat na ‘n volgende skietpunt beweeg word, beweeg die Baanoffisier of -beampte na elke skut en beveel: “wys veilig” en daarna “pak weg” – vuurwapen word met rooi veiligheidsvlaggie in posisie of grendel verwyder of oop of toe aksie met die slagpen ontspan in sak of tas gebêre.
16. Na alle vuurwapens geinspekteer is verklaar Baanoffisier: “Die baan is veilig, tel doppies op en beweeg na volgende skietpunt”.
17. Op opvolgende skietpunte van dieselfde skietoefening word die bevele vanaf punt 4 herhaal.
18. Na afloop van skietoefening moet vuurwapens veilig in sakke / tasse geplaas word, voordat tellings geneem of terug na die aanvanklike skietpunt geloop word.

Notas:

1. In geval van noodtoestand – “STAAKVUUR, STAAKVUUR!” of met lang fluitjie blaas.
2. Baanoffisier mag oorblywende tydsintervalle uitroep indien versoek word